

PABOJA ETEHUE'YO TESANONICA CUIÑAJJJO BA'E YASIJE EBIONEI 1 TESALONICENSES

*Pabohua esohui tehue canaje Jesusaja epeeji
cuana Tesanonica cuiñajjjo ba'e yasije*

¹ Eya Pabo. Sinasi, Timoteo pea'ai enijje nequi. Jiquio esohui ecuaaya tehueña miqiana huasi-
jje, ma Jesusaja epeeji nei cuana Tesanonica
cuiñajjjo ba'e yasije. Miquianaya Eyacuiñajji es-
eja Chii ai nijje jjapeequiani, Jesosa Quito ese-
jaya Emeshi Mese nei nijje jjapeequiani pea'ai.
¡Eyacuiñajjiya, Jesosa Quitohua pea'ai miqianaya
quea pame nee cajaahuana cahua! ¡Quea bei capo
mee cahua pea'ai!

Jesosaja epeeji cuana quea pame nee ba'yani

² Eyacuiñajji nijje mimianijo ecuaaya oya bi-
huiaña miqianajo. E'e, ecuana Eyacuiñajji nijje
mimi huicha'a huicha'ani miqianajo jama ba'a:

³ —Eyacuiñajji, ecuanaja Chii ai, Jesusaja epeeji
Tesanonicaajo ba'eca minijje jjapeequiani cuana
quea pame nee nee. Miya ojaya quea boti nee
nee; minijje quea pame nee chaco cani tii. Oya
cuana Jesosa Quito nijje, ecuanaja Emeshi Mese
nei nijje jjapee tiitiquiani quea pame nee. E'e,
jjashahuabaquiani jama ba'a: “Jesosaa ecuana
ba'e tiitii mee caje'yo onijje eyajo” —jamaya
ecuana mimiani Eyacuiñajji nijje miqianajo.

⁴ Epeeji cuana, miqúanaya Eyacuiñajjija quea jea nee nee. Ohuaya miqúanaya babaca majje iyaa canaje ojaya epeeji epo tiitii'yojji. Jamaya ecuanajaya eba.

⁵ E'e, ecuaaya Eyacuiñajjija esohui quea pame nee Jesusaja huohuinaje miqúanajaya eshajja'ajjaji. Edojjoshahua Pameya ecuanaya sohuihuohui meesahua canaje quea ja'a nee nee; miqúanaya ba mee canaje Eyacuiñajjija esohui e'e nei, dejjaja esohui pojjeama. Ecuana quea pame nee ba'enaje miquiana nijje. Jamajjeya ecuanaya miqúiaaya banaje quea pame nee ba'e. Jamajjeya miqúanaya ba'enaje quea pame nee ecuana jayojjaya.

⁶ E'e, miqúanaya ecuana jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuaa miqúanaya cuia canaje Jesosa nijje jjapee neineiquianijojo. Jamatii miquianaaya quea bihui neeya Jesusaja esohui shajja'ajjanaje; Edojjoshahua Pameya miqúanaya quea bihui nee po mee canaje.

⁷ E'e, miqúanaya quea ja'a nee jjapeequinaje Jesosa nijje. Jamajjeya ojjaña Jesusaja epeeji cuana Masenonia meshijo ba'eca cuana, Acaya meshijo ba'eca pea'ai miquiana ba majje quea ja'a nee jjapeequi sa poani Jesosa nijje miquiana jayojjaya.

⁸ Miqúanajaya esohui Emeshi Mese neiyo, Jesusajo ojjaña Jesusaja epeeji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miqúanaya Jesusaja epeeji quea ja'a nee poani. Ojjaña cuaa quea

huiso meshijo ba'eya pea'ai ba canaje miquianaya Eyacuiñajjija esohui jayojja jama po tiitiiani quea pame nee. E'e, ojjaña cuaa ojjaña meshi cuanajo ba'eya miquianajo shajja'ajja canaje. Jamajjeya ecuaaya oya cuana huohui o'oya jjima año.

⁹ Onaaya ca ca ecuaana huohui cani miquianajo jama ba'a: —Jesosaja epeeji cuana Tesanonicajo ba'e Pabojja esohui Jesosajo ebionei shajja'ajja jeahua jjashajja'ajjaquinaje quea bihui nee. Jesosaja epeeji cuana poanaje. Eyacuiñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe.

¹⁰ Ohuaya Eyacuiñajjija Bacua Ejja oe nei Jesosaja epoe o'oyajji ishoa'ajja cani —jamaya ojjaña miquianajo poani.

E'e, Eyacuiñajjija Bacua Ejja Jesosa mano'yajo, Eyacuiñajjiya oya ba'e mee ca o'oyanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuiñajjiya eseya sosequia caje'yo jiquio meshijo ba'ya poa sosejjeya; ohuaya eseya quea nee nee epo mee'yojji pojjeama shajjama' cuana nijje.

2

Pabo chacochoa poa Tesanonica meshijo

¹ Yahujajo ecuaaya Jesosaja esohui huohuinaje; miquianaya shajjama' pojjeama poa. Chojja, shajja'ajja neinei nequiaa poa. Miquianajaya jama eba pea'ai ba'a:

² Miquiana baa Tesanonica huasijje poqui jjimahua ecuana cuia canaje Jodio cuaa Pinipo cuiñajjijo ba'eca cuaa. Ecuana nijje mimijajinaje pea'ai. Pea cuaa ecuana cuia canaje Jesusaja esohui huohui mee ajjaa jjejojo; jamatii Eyacuiñajjiya ecuana ojaya esohui quea pame nee Jesosa Quitojo huohui meesahua canaje miquiana huasijje mete'ama, miqianajaya eshajja'ajjajji.

³ E'e, miquiana huasijje sohuihuohuiañaajo ecuanajaya ejjashahuabaquiiji quea ja'a nee poanaje. Ecuanaajaya esohui siajje pojjeama. Miquiana dasia sa po'yo ajja pea'ai.

⁴ Chojja. Eyacuiñajjiya eba ecuanaya siajjepojji pojjeama. Jamajjeya ohuaya ecuana huoojea canaje Jesusaja esohui quea pame nee huohuiya. Eyacuiñajjiya ejjashahuabaquiiji jayojja jama huohuiaña ecuaaya. Eyacuiñajjiya eba nei nei ecuanajaya ejjashahuabaquiiji ojaya ejjashahuabaquiiji jayojja jama poani tii. Ecuaaya oya quea bihui nee po mee sa ña ecuana nijje. E'e pojja'a pea cuana quea bihui pojjeama ecuanaja huohui'yojo. Jamatii ecuana jjashahuabaquiiani jama ba'a: —Ecuaaya esohui huohuiaña pea cuanaja ejjashahuabaquiiji jayojja jama pojjeama, pea cuana enijje quea bihui epojji pojjeama —chojja, Eyacuiñajji quea bihui nee po mee sa ña ecuana nijje.

⁵ Miquianajaya ecuana eba. Esohui quea bihui nisho mimi jjima miquiana nijje miquiana dasiajji, aquiana sosema' edojoji pea'ai. Chojja, Eyacuiñajjiya eba ecuanajaya ejjashahuabaquiiji quea pame nee.

⁶ Jjashahuabaqui ajja jama ba'a: —Ecuanaja eso-

hui quea pame nee shajja'ajja majje ecuana cabihua cahua cuaa; aquiana caquia cahua pea'ai — chojja, ecuana jjashahuabaqui ajja pea cuanaja ebihuiajji.

⁷ Ecuana Jesosa Quitoja huoojea'yo ojaya esohui huohuijji. Jamajjeya miquianajaya aquiana sosema' jjesHEME esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miquiana nijje quea bei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miquianaya anaje.

⁸ Miquianaya ecuanajaya quea boti nee nee poanijo Eyacuiñajjija esohui quea pame nee nee Jesusaja huohuinaje miquiana huasijje. Pea cuaa ecuana cuia ca chana' Jesusaja esohui ehuhui poaje jjejojo. Jamatii miquianaya ecuanajaya quea jea nee nee poanijo esohui huohui tiitiinaje.

⁹ E'e, miquianajaya eba miquiana nijje nequianijo ecuaaya janobajjima nei chaco tiitiinaje eba'ejji sosejje. Eyacuiñajjija esohui quea pame nee Jesusaja huohuiañajo chaco tiitiinaje epojjajo, mecajje pea'ai. Jamaya anaje ecuaaya. Jamajjeya miquianajaya ecuana eba'ejji quia jjima poanaje. Eyacuiñajjija esohui huohuinaje sosema' miquianajaya eshajja'ajjaji.

¹⁰ Ecuana miquiana nijje ba'enaje quea bei nee, mimishi'ama, quea pame nee, dejja tai'ama. Jamaya miquianajaya eba. Jamaya Eyacuiñajjija eba pea'ai. Jamajjeya ¿yajjajo pea cuaa ecuana niñeba cani so'o quea dejja tai poanaje miame?

¹¹ E'e, echii meseya oja bacua cuana cuiña cani quea pame nee jayojjaya jama ecuaaya

miquianaya anaje. Jamaya miquianajaya eba pea'ai.

¹² Ecuaaya miquianaya huohui majamajanaje jama ba'a: —¡Quea bihui nee Jesosa Quito nijje jjapeequicue! ¡A'a quea yeno pojji onaa miya quea mimishi acajje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña huoojea'yojji poani. Ohuaya miquianaya babaca canaje onijje eba'e tiitii'yojji eyajo. Jamajjeya ¡ojaya esohui jayojja jama ba'e tiitiicue Eyacuiñajji miquiana nijje quea bihui nee epojsi!

¹³ Ecuaaya Eyacuiñajji bihuiaña miquianajo jama ba'a: —Eyacuiñajji, eyaya miya bihuiaña Jesosaja epeejsi cuana Tesanonicajo ba'e quea pame nee poani yasijje. E'e, miyaya miquea esohui huohui meesahuañajo, onaaya shajja'ajja canaje. Quea bihui nee poanaje. Quea ja'a jjashahuabaquinaje jama ba'a: “E'e jojo nei Pabohua ojaya esohui pojjeama huohui cani; Eyacuiñajjija esohui quea pame ca ca huohui cani” poanaje cuana —jamaya ecuaaya Eyacuiñajji bihuia huicha'a huicha'aña miquianajo.

E'e epeejsi cuana, Jesosa nijje jjapeequianijo, Eyacuiñajjija miquianaya ba'e meesahua cani quea pame nee ojaya esohui e'e nei jayojjaya.

¹⁴ Yahuajo Jesosaja peejsi cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miquianaya Jesosa nijje jjapeequianijo, miquianajaya huapa pojjeama cuaa miquianaya cuia cani pea'ai.

¹⁵ E'e, yahuaajo nei nei Jodio cuaa Eyacuiñajjija esohui huohuijji cuana cuiajea ca'ya poa. Majoya esejaya Emeshi Mese nei Jesosa quecua mee ca'ya poa pea'ai. Jjeya eseya cuia cani pea'ai, Jodio cuaa. Shajjamaa po tiitiya jjejojo Jodio cuaa Eyacuiñajji quea quene po tiitii mee capoquiani. Jodio cuaa aje oe ojjaña dejja cuana quea tai acani.

¹⁶ E'e, ecuaaya Jodio pojjeama cuana huasijje Eyacuiñajjija esohui quea pame nee Jesusajo huohuiaña. Jodio pojjeama cuana Jesosa nijje jjapeequi mee sa aña onijje eyajo eba'e tiitii mee'yojji quea pame nee. Jamatii Jodio cuaa aje oe ecuaana Jesusaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiani. Jamajojoya aje jja oe Eyacuiñajji quea quene nee poani Jodio cuana nijje. Quea yeno nee nee po tiitii mee cani Jodio cuana.

Pabo poqui o'oya sa poanaje Tesanonica huasijje

¹⁷ Epeejji cuana, yahuaajo ecuaana miqiuana nijje nequijo, Jodio cuana ecuaana nijje quea quene nee nee poanaje. Jamajjeya miqiuana nijje nequi tiitii jjima poanaje. Jamatii miqiuana ecuanajaya pajea'yo jjima. Chojja, miqiuanao jjashahuabaquiani tii. Poqui o'oya sa neinei poanaje miqiuana baa. Mi poqui mee ca o'oyajje ecuaana quea yeno nee poanaje.

¹⁸ E'e jojo nei ecuaana poqui o'oya sa poanaje miqiuana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje.

19 E'e jojo nei miqúanaya Jesosaja epeeji poanijo, ecuana quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miqúiana onijje nequi'yajo, ecuana quea bihui nee poaje'yo. E'e, jiquio ecua se chacochoajo sosequia cajje eseya quea bihui nee poani jayojja jama ecuana quea bihui nee nee poaje miqúiana Jesosa nijje nequi ba majje.

20 E'e, miqúanaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pea'ai miqúanajo.

3

Pabohua Timoteo huoojea canaje Tesanonicajo ba'eca cuana ba'ajja'yohua

1 Jamajjeya miqúanajo quea yeno jjashahuaba tiitiqúi majje eya jama poanaje ba'a: —E'e, eya ee nei Atena cuiñajjijo nequije. Timoteo, ¡miya poquicue Jesosaja epeeji cuana Tesanonicajo ba'e baa! —eya poanaje.

2 Majoya eyaya esejaya epeeji nei Timoteo huoojeanaje miqúiana baa. Timoteohua ecuana nijjeya Eyacuiñajjija esohui quea pame nee Jesosaja huohui tiitii cani. Eyaya oya huohuinaje jama ba'a: —Timoteo, ¡Jesosaja epeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesosaja esohui jayojja jama atiitii meesahuacue quea bihui nee!

3 Jamajjeya onaaya oya cuana cuia canijo, Jesosa nijje jjapeepajeaqui'yo ajja —jamaya eyaya Timoteo huohuinaje miqúiana que huoojea jjimahuaa.

Jamatii miqúanajaya eba pea cuaa Jesosaja epeeji cuana cuia caje'yo. Eyacuiñajjija eba eseya ojaya epeeji cuana quea ja'a poaje onaa cuia cajje. Jamajjeya cuia pajea mee jjima acani.

⁴ E'e, yahuaajo miqúiana nijje nequiya ecuaaya huohuinaje jama ba'a: —Jesosaja epeeji poanijo pea cuaa eseya cuia caje.

E'e jojo nei. Jjeya pea cuaa miqúanaya cuia cani. Jamaya miqúanajaya eba.

⁵ Jamajjeya eya quea mete miqúanajo poanaje. Timoteo huoojeanaje miqúiana baa: —¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miqúanajo poanaje. E'e pojja'a Edosiquiana neiya miqúanaya Jesosa nijje jjapeequi pajea mee ca'yonaje. Jamaya epo'yo jojjemo, miqúanajaya Eyacuiñajjija esohui epajea'yo jojjemo ecuaana quea yeno pome; esohui huohuijajji pojja'a eyaya sohuihuohuijaja nequinaje.

⁶ E'e de, miqúiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epeeji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajjija esohui jayojja jama po tiitiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuaba tiitiiquiani quea pame nee. Jiquio ecua ecuanaya jjashahuabaquinaje o baquiiji jamaya oya cuana jjashahuabaquiani ecuaana bahuajji —jamaya eya Timoteohua huohui caña'yonaje miqúanajo.

⁷ Jamajjeya ma shajja'ajja majje ecuana quea bihui nee poanaje. E'e de, ecuana aema' poani Jesosa nijje jjapeequianijo. Pea cuaa ecuana cuia cani pea'ai. Jamatii miqianaya ecuana quea bihui nee po meeña. E'e, miqianaya Jesosa Quitoja esohui jayojja jama poanijo tii miqianaaya ecuana quea bihui nee nee po meeña.

⁸ E'e de, miqianaaya esejaya Emeshi Mese neija esohui jayojja jama atiitiaño, ecuana quea bihui nee, quea bei nee pea'ai poani.

⁹ E'e jojo nei jjeya miqianajo ecuaaya Eyacuiñajji bihuia neineiaña. Eyacuiñajjiya ecuana quea bihui nee po mee cani miqianaya quea pame nee onijje jjapeequianijo.

¹⁰ Jamajjeya ecuana onijje mimi tiitiani jama ba'a: —Eyacuiñajji, ¡ecuana poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuana Eyacuiñajji nijje mimiani ojjaña pojjajo, ojjaña mecajje pea'ai.

¹¹ Ecuana onijje mimi neineiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuana poqui meesahuacue Tesanonica huasijje miquea epeeji cuana baa!

¹² E'e Emeshi Mese nei, ¡miquea epeeji cuaa Tesanonicaajo ba'e cuaa pea miquea epeeji cuana quea jea nee nee ameesahuacue! ¡Ojjaña cuana pea'ai quea jea nee nee ameesahuacue! ¡Ecuaa oya cuana quea jea nee nee ña jayojjaya jama oya cuana pea cuana quea jea nee ameesahuacue pea'ai!

13 E'e Eyacuiñajji, ecuanaja Chii ai, ¡oya cuana Jesusaja epeeji cuana quea ja'a nee po meesahuacue quea boejea, mimishi'ama eba'e'yojji! Jamajjeya ecuanaja Emeshi Mese nei Jesusaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caje'yo quea boejea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiani miquiana huasijje.

4

¡Quea pame nee ba'ecue Eyacuiñajji minijje quea bihui epojji!

¹ Jamajjeya epeeji cuana, eyaya pea esohui tehueje miquianajaya ebajji. Yahuajo ecuaaya miquianaya huohuinaje quea pame nee eba'e'jji. Ma ecuanajaya esohui jayojja jama ba'yanijo, Eyacuiñajji quea bihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesosa Quitohua ecuana ma esohui tehue mee ca o'oyani miquiana huasijje quea pame tii eba'e poquijji.

² Yahuajo esejaya Emeshi Mese neiya, Jesusaa ecuana huoojea canaje miquiana sohuihuohuiya. Ma esohui miquianajaya eba.

³ Eyacuiñajjija ejjashahuabaquijji miquianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji!

⁴ Dejja cuana, ¡miquianaya eponajo jjahuanacui sa poanijo quea ja'a nee jjashahuabaquicue! ¡Ey-

acuiñajjija esohui jayojja jama epona huanacue quea pame nee!

⁵ ¡A'a quea mimishi jjashahuabaquijji Eyacuiñajjija epeeji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani.

⁶ Onajaya ehuanase sii canijo, e'e jojo nei Eyacuiñajjiya dejja cuana quea nee nee po mee caje'yo. Jamajjeya miquianaaya ca ca ¡a'a onajaya ehuanase siiji! ¡A'a jea bajji pea'ai! —jamaya Eyacuiñajji jjashahuabaquiani ojaya epeeji cuana. Jamaya yahuajo ecuaaya miquianaya huohuinaje.

⁷ E'e, Eyacuiñajjiya eseya iyaa majje huohui canaje jama ba'a: —¡Ecuea epeeji cuana po majje ecuea esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'eji!

⁸ Jiquio esohui cuana Eyacuiñajjija esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeequi sa po'yo ajja; Eyacuiñajji cajaa a'yojji poani. Eyacuiñajjiya ca ca oe ese yasi-jje ojaya Edojjoshahua Pame huoojea ca'yonaje quea pame nee eba'e meesahua'yojji.

⁹ Miquianaaya Jesusaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajjiya miquianaya jjabahuejja meequi canaje ojjaña ojaya epeeji cuana quea jea nee e'ajji.

¹⁰ E'e jojo nei miquianaaya jamaya añã; Jesusaja epeeji cuana ojjaña Masenonia meshijo ba'e cuana quea jea nee añã. E'e, Eyacuiñajjija

esohui jayojja jama aña miquiaaya. Epeeji cuana, ¡Jesosaja epeeji oe quea jea nee nee atitiicue! Jamaya ecuaaya miquianaya huohui neineiaña.

¹¹ Yahuaje ecuaaya miquianaya sohuihuo-huinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje! ¡Miquea bobijo, daquijo, eba'ejjijo pea'ai chacocue! ¡Quea ja'a nee jjashahuaba tiitiiquicue!

¹² Jamajjeya miquianaya aquianajji poaje; miquianaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaya quea pame ba'yani ba majje Jesosaja epeeji pojjeama cuaa miquianaya shajja'ajja caje Jesosaja esohui miquianaaya huohuiañajo. Jamajjeya miquianaya quea pame ba'eje.

Emeshi Mese nei Jesosa poe o'oyajo ojaya epeeji emano'yo cuana shequije o'oya

¹³ Epeeji cuana, eyaya jiquio pea esohui tehueaña miqiana ba meejji e'e jojo nei Jesosaja epeeji cuanajo, ma yahuaje mano ca'ya poajo. Jamajjeya miquianaya yeno'ama poaje emano'yo cuanajo. Pea cuana ca ca, Jesosaja epeeji pojjeama cuana quea yeno nee nee poani emano'yo cuana shequi'yo jjima poanijo poso.

¹⁴ Esejaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojjaya Jesosaja epeeji cuana mano'yajo, Eyacuiñajjiya oya cuana shequi mee caje o'oya. Jamajjeya Jesosa poe o'oyajo Eyacuiñajjiya onijje huoojea caje ojaya epeeji ma yahuaje

mano'ya poa cuana. Jamaya e'e jojo nei; jamaya jashahuabaquime eseya poani.

¹⁵ E'e, Emeshi Mese neiya Jesosaa ecuana huohui ca poa jamaya eyaya miquianaya huohuiaña jama ba'a: Poe o'oya majje Emeshi Mese neiya, Jesosaa ojaya epeeji eshe nequi cuana, ojaya epeeji yahuajo emano'yo cuana nijje ojee jjequisohua caje'yo onijje eyahuasijje.

¹⁶ E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuanajjiya quea ca'a nee neeya emiajji mia cani jayojja taaame poaje, janobajjima nei nei. Eyacuiñajjiya emiajji mia caje cuaa pea'ai. Majoya Emeshi Mese nei eyajo ani jashashineijje nequioqueje bo biajje nequi. Jamajjeya ojaya epeeji cuanaja, ma yahuajo mano'ya poaja eyami eshe po mee caje o'oya, eyacua.

¹⁷ Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiije'yo Emeshi Mese nei nijje, Jesosa nijje.

¹⁸ Jamajjeya jiquio esohuijo quea bihui nee nee pocue! ¡Jesosaja pea epeeji cuana quea bihui nee po meesahuacue! ¡Jiquio esohui cuana huohui huicha'a huicha'acue! Jama ba'a: —Jesosaa ojjaña ojaya epeeji cuanaja eyami eyacua po mee majje jjequisohua caje'yo eyahuasijje onijje eba'e tiiti'yojji, ojaya epeeji yahuajo mano'ya poa cuana nijje pea'ai.

5

¡Jesosaja epoe o'oyajji jashahuaba tiitiquicue!

¹ Epeeji cuana, ¡shajja'ajjacue mo oe! Jesosaja epoe o'oyajji miqúanajaya eba. Jamajjeya eyaya miqúana huasijje etehuejji pojjeama ache pojajajo oya poeje o'oya ebajo ese.

² Chojja, ¿ache pojajajo shai poeje o'oya Jesosa? Emeshi Mese neija epoe o'oyajji esejaya ba jjima epojja. Jiquio ecua siipojji quehuajje poecujiani jayojja jama Jesosa quehua poecujije o'oya.

³ O poe jjimahuajo pishana mimishi cuana jama poaje ba'a: “Ojjaña quea bei poani. Ecuana quea pame nee ba'e tiitiije'yo” onaa jama po'ajjaquijo tiya Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama' ejja'aniquehuaquijji poaje. Jiquio ecua epona cuana bacua nee cuajiani jama poecujime poaje Jesosa.

⁴ Ecuea epeeji cuana, miqúanaya Jesosa nijje jjapeequiani. Jamajjeya ¡quea ja'a nee jashahuabaquicue! ¡Jesosaja epoe o'oyajji ishóa'ajja anicue! Jamajjeya ¡jiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishóa anicue!

⁵ Ojjaña miqúanaya onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji!

⁶ Pea cuanaa ca ca Jesosaja epoe o'oyajji ishóa ajja. Jamaya pojjeama eseya. Chojja. ¡Jesosaja

epoe o'oyajji ejja'ishoa'ajjaqui! ¡Quea ja'a nee ej-jashahuabaqui pea'ai!

⁷ Shajjama' cuana quea jjashahuabaqui quehua poani Jesusaja epoe o'oyajji ishoa ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecajje huoo majje shajjama' cuana jjashahuabaqui ajja jayojja jama onaya Jesusaja epoe o'oyajjiijo jjashahuabaqui ajja.

⁸ Eseyá ca ca, Jesusaja epeejji cuana quea ja'a nee ba'yani Eyacuiñajjiya esohui jama. Quea ja'a nee jjashahuabaquiiani. Jamajjeya Jesusaja epoe'yojji ishoa'ajjaña. E'e, jiquio ecua sohuinanohua baa daqui quea moo ese'ojje huosho cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajea meesahua caje. Jiquio ecua sohuinanohua ejaahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo.

⁹ ¿A'a Eyacuiñajjiya eseya babaca canaje cuaqui yasijje quea nee nee epo'yojji? Chojja. Esejaya Emeshi Mese nei nijje, Jesosa Quito nijje jjapeequianijo, mimishi cuana cuijea majje Eyacuiñajjiya eseya ba'e tiitii mee caje'yo onijje.

¹⁰ E'e, Jesosa Quito eseja mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojja'a o poe o'oya jjimahuaajo eseya manoj'e'yo. E'e pojja'a oya poeje o'oya ese eshe

nequijo. Jamatii ojjaña eseya onijje ojee ba'e tiiti-ije'yo eyajo.

¹¹ Jamajjeya ¡jiquio esohuijo quea bihui nee nee pocue! ¡jiquio esohui huohui huicha'a huicha'acue Jesusaja epeeji cuana quea bihui nee epojji! ¡Oya cuana Jesosa Quito nijje quea jaji nee jjapeequi meesahuacue pea'ai! Jamaya miquiaaya aña; ¡jamaaya oe atiitiicue!

Pabohua eba'ejji quea pamejo tehue canaje

¹² Epeeji cuana, jjeya eyaya pea esohui tehueaña miquianaja ebajji jama ba'a: ¡Jesusaja epeeji etii cuana miquiana nijje nequi shajja'ajjacue oe! Ohuaya miquianaya jaahuana cani, Eyacuiñajjija esohui huohui cani pea'ai.

¹³ Oya cuana Eyacuiñajjijo quea pame nee chachacoanijo ¡quea boti nee acue! ¡Quea pame nee jjashahuabaquicue onajo pea'ai! ¡Ojjaña Jesusaja epeeji cuana nijje quea bei pocue!

¹⁴ E'e epeeji cuana, jama acue pea'ai ba'a: Jesusaja epeeji quea huea poanijo, ¡janobajjima nei onijje mimicue! ¡Epeeji quea mete cuana quea bei po meesahuacue! Epeeji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiitiicue ojjaña cuana nijje!

¹⁵ Onaa miya napa cajje ¡a'a jjasoseaquijji! ¡A'a onaya napa pea'aijji! ¡Ojjaña pojjajo jjashahuaba neinei quicue ojjaña Jesusaja epeeji cuana nijje, pea cuana nijje pea'ai quea pame nee epojji!

¹⁶ Jesusaja epeeji poanijo ¡quea bihui nee po tiitiicue!

¹⁷ ¡Eyacuiñajji nijje mimi huicha'a huicha'acue ojjaña pojjajo!

18 Miqúanaya quea pame ba'yanijo, quea camaja miqúanajo poanijo pea'ai ¡jamatii Eyacuiñajji bihuiacue oe! Jamaya Eyacuiñajjija ejjashahuabaqui'yojji miqúanajo, Jesosa Quito nijje jjapeequianijo.

19 Edojjoshahua Pame minijje mimianijo, ¡a'a shajjama' pojji!

20 Eyacuiñajjija esohui huohuijjiya esohui huohui canijo, ¡shajja'ajja neineicue oe!

21 ¡Jamatii ojjaña esohui shajja'ajja neinei majje quea ja'a jjashahuabaquicue! ¡Esohui e'e nei jama acue!

22 ¡Ojjaña mimishi cuana pajea neinei'yocue! E'e, ¡quea pame nee nee ba'e tiitiicue!

23 Jamajjeya eya Eyacuiñajji nijje miqúanaya huasijje mimiani jama ba'a: —Eyacuiñajji, miyaya ojjaña quea bei po tiitii meeaña. ¡Miquea epeejji cuana minijje jjapee neineiqui meesahuacue quea boejea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miqúanaya huasijje.

24 Eyacuiñajjiya ojaya esohui miqúanaya nijje epajea'yojji pojjeama tii tii. Ohuaya miqúanaya iyaa canaje onijje ejjapee tiitiiqui poquijji. Jamajjeya ohuaya miqúanaya jjapeequi tiitii mee caje'yo quea pame nee nee.

25 Ecuea epeejji cuana, ¡Eyacuiñajji nijje mimicue ecuanajo, ejo pea'ai!

²⁶ Ojjaña Jesusaja epeeji cuana nijje quea bi-hui nee mimicue jama ba'a: —Pabo miquianajo jjashahuaba tiitiquiani; quea jea nee nee pa mi Pabojá.

²⁷ Eyaya Emeshi Mese nei Jesusaja esohui huohuiji poaniya miquianaya huohuiaña jama ba'a: ¡Jiquio ecuea esohui etehue'yo ojjaña Jesusaja epeeji cuana huasijje huohuicue, ojjaña tii! Jamaya.

²⁸ ¡Esejaya Emeshi Mese neiya Jesosa Quitohua miquianaya quea pame nee cajaanuana cahua! Mahuiso. Eyaya Pabohua jiquio esohui tehue'yonaje. Apoa.

Eyacuiñajjija Esohui **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files
dated 29 Jan 2022

88838088-e20d-51ca-8c91-69194f5ae678